

## **To'on yó'o kían mií noó ni taa San Juan ni sa'an noó na kúú kuendá Jesús**

**Yó'o ká'an San Juan sa'a Jesús, na xí'o ña kataki chíchí yó**

**1** <sup>1</sup> Kásto'on ndu'u xí'ín ndo'ó sa'a na sa daá ió tá ni kava'a ñayuu yó'o. Chì ni seídó'o ndu ña ni ka'an mií ná, ta ni xini ñaá ndú xí'ín noo ndú, ta ni xini va'a ndu ndidaá ña ni kee na, ta kúú ni tiin ñaá ndú xí'ín ndá'a mií ndú. Ta na yó'o kúú to'on xí'o ña kataki chíchí yó. <sup>2</sup> Ta ni na'a noó na xí'o ña kataki chíchí yó noo mií ndú, ta ni xini ñaá ndú. Sa'a ñoó xí'o ndaa ndu kuendá sa'a ña ni xini ndu, ta kásto'on ndu sa'a na daá takí kuií, na sa daá ió xí'ín tatá yo Ndios. Ta ni kixi na, ta ni na'a noo ná noo ndú. <sup>3</sup> Ta kásto'on ndu xí'ín ndó sa'a ña ni xini ndu, xí'ín sa'a ña ni seídó'o ndu, dá kían iin tó'ón ná kakuu ndó xí'ín ndu'u, táto'on k'i'o iin tó'ón kúú ndu'u xí'ín tatá yo Ndios, xí'ín de'e na Jesucristo. <sup>4</sup> Ta táa ndu to'on yó'o kosaa noo ndo'ó, dá kían ndino'o ini ndo ná kadij ini ndo.

**Miian kánian nakoni yo ña yá'a yó kée yó kuachi noo Ndios**

<sup>5</sup> Di'a kua'an ña ni daná'a Jesucristo noo ndú'u, sa'a ñoó kásto'on ndu xí'ín ndó. Chì ni daná'a na noo ndú ña ndato tóon Ndios, chì na vii kúú ná, ta ni lú'u ko iin naá ná. <sup>6</sup> Sa'a ñoó tá kaá yo ña iin ni nduu yó xí'ín ná, ta xionoo ii yo íchi noo iin naá, ña kúú íchi kini, dá kían kúú yó ñayuu to'ón, ta ko kée yó ña ndaa. <sup>7</sup> Tído tá xionoo yó íchi ndato tóon, ña kúú íchi vii, táto'on k'i'o ndato vii kúú mií Ndios, dá kían iin ni nduu iin rá iin yó, ta ni ndoo kuachi yó ni kee ni de'e na Jesucristo. <sup>8</sup> Chì tá kaá yo ña ko kée yó kuachi, dá kían danda'í yo mií vá yó, ta ko ta'ón ña ndaa nákaa ini nío yo. <sup>9</sup> Tído tá ná na'o yo kuachi yó noo Ndios, dá kían k'i'o ká'ano ini na sa'a yo, ta nduvii ná yó noo ndidaá ña kini kée yó, chì iin na ndaa kúú ná, ta iin ndaa na xí'ín to'on ni ka'an na. <sup>10</sup> Chì tá kaá yo ña ko kée yó kuachi, dá kían ketó'ón yó Ndios, ta ko ta'ón to'on na nákaa nío yo.

**Jesús kúú na ni chiya'i sa'a kuachi yó ndika cruz**

**2** <sup>1</sup> De'e kuálí mií, táai ndidaá kúú to'on yó'o kosaa noo ndo, dá kían ná dá'a ni kee ndó kuachi. Tído tá ni ya'a iin káa ndó ni kee ndó kuachi, kana'á ndó ña ió iin na seí nda'í sa'a yo noo tatá Ndios. Ta na yó'o kúú Jesucristo, na kúú na ndaa. <sup>2</sup> Ta na yó'o kúú na ni chiya'i sa'a kuachi yó, dá kuu ku'u ká'ano ini Ndios sa'a yo. Ta o duú sa'a kuachi yó oon ni ni chiya'i na sa'a, nda sa'a kuachi ndidaá kúú ñayuu ndéi ñayuu yó'o ni chiya'i na.

**Tá miñan ndaa ná'á yó Ndios, dá kían kánian kueídó'o yó choon sa'ándá na**

<sup>3</sup> Tá kée yó choon sa'ándá Ndios, ñóó kían xí'o ña kandaá ini yo ña miñan ndaa ndisa ná'á yó na. <sup>4</sup> Ta ndi ndaa mií na kaá ña ná'á ná Ndios, ta ko kée na choon sa'ándá na, dá kían kúú ná ñayuu to'on, ta ni lú'u ña ndaa ko nákaa ini níó ná. <sup>5</sup> Tído na kée choon sa'ándá to'on Ndios, noón ndisa kúú na ni kasandaá kú'u ini sa'a dao ka ñayuu táto'on kí'o kée Ndios. Ta ña yó'o xí'o ña kandaá ini yo ña ñó'o yó noo ndá'a ná. <sup>6</sup> Tá kaá yo ña ñó'o yó noo ndá'a Ndios, dá kían kánian kee yó táto'on kí'o ni sa kee na tá sa xionoo na ñayuu yó'o.

**Táa Juan iin choon saá**

<sup>7</sup> Ñani, ko ta'on choon saá kían táai kosaa noo ndo. Di'a choon yata kían, tá'an ña sa daá ió noo ndo nda mií sa'a, chi ña yó'o kúú choon yata ni seídó'o ndó nda mií sa'a. <sup>8</sup> Tído kuu va kaa yo ña iin choon saá kían táai kosaa noo ndo, chi miñan ndaa ni kee Jesús choon yó'o, ta nda mií ndó kée ña. Chi sa kua'an ndañó'ó vá ña íin naá noó ñayuu, ta sa kua'an natuu va noo ná kée mií Ndios. <sup>9</sup> Ta ndi ndaa na kaá ña nákaa na íchi noo ndato toon, ta xiní u'u jí vá ná ñani na, dá kían nákaa jí vá ná íchi noo íin naá, ña kúú íchi kini. <sup>10</sup> Tído na kú'u ini sa'a ñani na, noón kúú na nákaa íchi noo ndato toon, ta ko ta'on ña'a kedaá xí'ín ná, dá kankao na noó kuachi. <sup>11</sup> Tído na xiní u'u ñani na, noón kúú na nákaa noo íin naá, ta xionoo na íchi noo íin naá, ta ko ná'á ná ndeí chí ko'on na, dá chi ni sadi va ña íin naá nduchí nóó na.

<sup>12</sup> De'e kuálí, táai to'on yó'o kosaaan noo ndo, dá chi sa ni xi'o ká'ano va ini Ndios sa'a kuachi ndó sa'a ña ni kee Jesús. <sup>13</sup> Ta táa ta'ani yu'u to'on yó'o kosaaan noo ndo'ó, na kúú tatá, dá chi sa ná'á vá ndó sa'a na sa daá ió tá ni kava'a ñayuu yó'o. Ta táa ta'ani yu'u to'on yó'o kosaaan noo ndo'ó, takuáchí tákí, dá chi ni kandeé ndó xí'ín ña u'u. Ta táai to'on yó'o kosaaan noo ndo'ó, de'e kuálí, dá chi sa ni kasandaá ndo ná'á va'a ndó tatá Ndios. <sup>14</sup> Ta táa ta'ani yu'u to'on yó'o kosaaan noo ndo'ó, na kúú tatá, chi sa ná'á vá ndó sa'a na sa daá ió tá ni kava'a ñayuu yó'o. Ta táa ta'ani yu'u to'on yó'o kosaaan noo ndo'ó, takuáchí tákí, dá chi ndíta toon ndó xí'ín Ndios, ta ni natiin ndó to'on na ini níó ndo, ta ni kandeé ndó xí'ín ña u'u.

**O sa ndí'i ini yo sa'a ña kúú kuendá ñayuu yó'o**

<sup>15</sup> O sa ndí'i ini ndo sa'a ña kúú kuendá ñayuu yó'o, ni sa'a ña'a ió nooán. Ta ió iin kaa ndó ndí'i ini sa'a ña ió ñayuu yó'o, dá kían ko kóni ta'on ndó tatá Ndios. <sup>16</sup> Dá chi ndidaá ña'a kúú kuendá ñayuu yó'o, ña kúú kuachi kátoó ñayuu kée na xí'ín ñíi ná, xí'ín ña kátoó na kakomí ná ndidaá ña'a xiní na, xí'ín ña kátoó na kandaya'i mií ná, ni iin ña yó'o ko

véi noo Ndios, ña'a kuendá ñayuu yó'o va kíán. <sup>17</sup> Ta sá ndí'i va ñayuu yó'o kua'an xí'ín ndidaá ña kini kátoó ñayuu kée na. Tído na ndéi kée ña kóni Ndios, noón kúu na kataki chíchí.

**Kandaa ndo mií ndó, chí ndeí kúu míí vá xionoo taa xiní u'u  
Jesucristo**

<sup>18</sup> De'e kuálí, sa kua'an kasandaá va tiempo noo ndí'i. Sa ni seídó'o vá ndó ña kasaa iin taa xiní u'u Cristo, ta ndee ra mií rá kúu rá Cristo. Ta sa ni kasá'á vá xionoo kua'á nda'o taa xiní u'u Cristo. Sa'á ñoó sa kátóni va inio ña sa kua'an kasandaá tiempo noo ndí'i. <sup>19</sup> Ta tein mií vá yó ni kankuei ra, tído o duú kuendá yo ni sa kuu ra. Dá chí tá kuendá yo ni sa kuu ra, dá kían kandita toon ra xí'ín yó, ní kúu. Díon ni kee ra, dá ni kandaá ini yo ña o duú ndi ndí'i ra kúu kuendá yo. <sup>20</sup> Tído ni nakutí ndó xí'ín Espíritu i Ndios, sa'á ñoó kandaá va'a ini ndo ndí kíán kúu ña ndaa. <sup>21</sup> Ta ko táa ta'on yu'u to'on yó'o kosaaan noo ndo sa'á ña ko ná'á ndó ndí kíán kúu ña ndaa. Di'a táai ña kosaa noo ndo sa'á ña ná'á ndoan. Chí sa ná'á va'a ndó ña ni iin tó'on ña to'on o kúu kakaa tein ña ndaa. <sup>22</sup> Ta, ¿ndá yoo kúu na to'on? Na to'on kúu na ko nákoní ña Jesús kúu Cristo, na dákaí ñaá. Tá'an na kée díon, noón kúu na xiní u'u Cristo, chí ko nákoní na tatá Ndios, ta ni de'e na. <sup>23</sup> Ta ndi ndaa na ko nákoní de'e Ndios, noón kúu na ko ta'on tatá Ndios ío xí'ín ná. Tído na nákoní de'e Ndios, noón kúu na ío tatá Ndios xí'ín ná. <sup>24</sup> Koo ini ndo kandita toon ndó xí'ín ña ni seídó'o ndó sa'a Jesús nda rá mií sa'a. Dá chí tá ndíta toon ndó xí'ín ña ni seídó'o ndó, dá kían ñó'o ndó noo ndá'a de'e Ndios, ta ñó'o ta'ani ndó noo ndá'a tatá na. <sup>25</sup> Chí ni xi'o Jesús to'on na noo yo ña kían kí'o na ña kandeí chíchí yó xí'ín mií ná.

<sup>26</sup> Ta táai to'on yó'o kosaa noo ndo, dá kandaá ini ndo ndi kée taa kátoó dándalí ñaá. <sup>27</sup> Tído sa ni nakutí ndó xí'ín Espíritu i Ndios, ta daá ío va na xí'ín ndó. Sa'á ñoó ko xínñó'ó ka ndo ña dána'a dao ka ñayuu noo ndo, dá chí sa'á ña ni nakutí ndó xí'ín Espíritu i Ndios, sa'á ñoó ni dána'a na noo ndo sa'a ndidaá kúu ña'a. Ta ña dána'a na noo ndo kúu ña ndaa, ta ko kíán ña to'on. Táto'on kí'o ni dána'a Espíritu i noo ndo, kí'o díon koo ini ndo kandita ndaa ndo xí'ín Jesús.

<sup>28</sup> Ta viti, de'e kuálí, kandita toon ndó xí'ín Jesús, dá kían koo tandeé iní noo ndo tá ná na'a noo tuku na noo yo. Ta ni iin ña'a o kedaá xí'ín ndó, dá xíka'an noo ndo tá ná nandió ko na kasaa na. <sup>29</sup> Ta sa ná'á ndó ña kúu ná iin na ndaa, ta kánian kana'á ta'ani ndó ña ndi ndaa na kée ña ndaa, noón kúu de'e Ndios.

**Kúu yó de'e Ndios**

**3** <sup>1</sup> Kande'é ndó ndi kí'o ví kú'u ini tatá Ndios sa'a yo, chí ni xi'o na ña kían kuu kananí yó de'e mií ná, ta miían ndaa díon kíán. Sa'á ñoó na kúu kuendá ñayuu yó'o ko nákoní na yó, ña kúu yó de'e Ndios,

dá chí ni mií Ndios kō nákoní nā. <sup>2</sup> Nā manií, sá kúú vá yó de'e Ndios viti, ta kámani vá kandaá ini yō ndí kían kasandaá yō kakuu yó. Tído sá ná'á yó ñā tá ná nandió kōo Jesús kasaa nā, dá kían kakuu yó táto'on kī'o kúú mií ná, dá chí koni túu yó nā táto'on kī'o káa rá ió nā. <sup>3</sup> Ta ndidaá kúú nā kómí tandeé iní yó'o, noón kúú nā ndúvii mií, táto'on kī'o vii mií Jesús.

<sup>4</sup> Ta ndi ndáa ñayuu yá'a kée kuachi, noón kúú nā xío kao na choon ni sa'anda Ndios. Dá chí ndidaá tá'an kuachi xío kao choon ni sa'anda Ndios. <sup>5</sup> Ta sá ná'á va'a ndó ñā ni kii Jesús ñayuú yó'o ni dítá ná yó noo kuachi, ta ni iin tó'ón kuachi mií ná kō ní sá io. <sup>6</sup> Ta ndidaá ñayuu ñó'o noo ndá'a Jesús kō yá'a ta'on na kée na kuachi. Tído ndidaá nā yá'a kée kuachi, ni iin kuu kō ní xini nā Jesús, ta ni kō ná'á ñáá ná.

<sup>7</sup> De'e kuálí, o sá kónó ndó ñā dándá'í ñáá ñayuu, chí ndi ndáa mií vá ñayuu kée ñā ndaa, noón kúú ñayuu ndaa, táto'on kī'o ndaa mií Jesús. <sup>8</sup> Tído nā kée kuachi, noón kúú kuendá ñā u'u, dá chí ñā u'u kían kée kuachi ndá rá ni kasá'á sa'a ñayuú yó'o, ta nda viti kée íían dión. Sa'á ñóo ni kixi de'e Ndios ni danaá ná ñā kini kéean. <sup>9</sup> Ta ñayuu ni nduu de'e Ndios kō kée ká kuachi, dá chí ñā kóni Ndios nákaa ini nío ná. Sa'á ñóo o kúu ta'on ya'a na kee na kuachi sa'á ñā ni nduu na de'e Ndios. <sup>10</sup> Ta kī'o dión kándaá iniō ndá yoo kúú de'e Ndios, ta ndá yoo kúú de'e ñā u'u. Chí ñayuu kō kée ñā ndaa, xí'ín nā kō kú'u ini sa'a ñayuu xí'ín ná, noón kúú nā kō kúú de'e Ndios.

### Ná koo ini yō ku'u ini sa'a sátá'an yó

<sup>11</sup> Ta ñā yó'o kúú to'on va'a ni seídó'o ndó nda mií sa'a, ñā ná ku'u ini sa'a sátá'an yó. <sup>12</sup> Ta ná dá'a ni kee yó táto'on kī'o ni kee Caín tá sá na'á, chí ni sá íin rā xoo ñā u'u. Sa'á ñóo ni sa'ání rá ñani ló'o mií rá. Ta, ¿ndiva'a ni sa'ání ñáá rá, ká'an ndo'ó? Dá chí ndino'o ñā kini va sá kee ra, ta ndino'o ñā va'a ni sá kee ñani rā noo Ndios. <sup>13</sup> Sa'á ñóo, ñani mií, o sá náá iní ndo tá xiní u'u ñáá ñayuu kō ná'á Ndios. <sup>14</sup> Ta ná'á yó ñā sá ni kanxoo yó noo kúú íchí noo kua'an yō kuu yō, ta viti ñó'o yó íchí noo kataki chíchí yó, chí kú'u ini yō sa'a ñani yō. Ta nā kō kú'u ini sa'a ñani nā, noón kúú nā ñó'o íí vá íchí noo kuu nā. <sup>15</sup> Ta ndidaá ñayuu xiní u'u ñani nā, noón kúú iin nā sa'ání ndii noo Ndios. Ta sá ná'á vá ndó ñā ndidaá nā sa'ání ndii kō ñá'a ta'on ni'í ná ñā kataki chíchí ná noo Ndios. <sup>16</sup> Ta sá kándaá va'a ini yō ndí kían keeá, dá ku'u ini yō sa'a ñani yō. Chí táto'on kī'o ni nakī'o Jesús mií ná ni xí'í nā sa'a yō, kī'o dión ta'ani kánian nakī'o yó mií yó kuu yō sa'a ñani yō. <sup>17</sup> Tído tá ió ñá'a noo yō ñayuú yó'o, ta ndé'é yó ñā xínñó'ó ñani yō ñá, ta kedi'inda yoán noo ná, dá kían, ¿ndí kaá yō ñā kú'u ini yō sa'a ná táto'on kī'o kée Ndios, tá dáá? <sup>18</sup> De'e kuálí, ná dá'a ni ku'u ini yō sa'a dao ká ñayuu xí'ín to'on ká'an oon ni yó, o xí'ín to'on kánkuei yú'u óon ni yó. Va'a kaan ná ku'u ini yō sa'a ná xí'ín ñā va'a kée yó, ta ná chindeé ndisa yó nā.

<sup>19</sup> Tá kée yó dión, dá kían kándaa inio ña miían ndaa kúú yó kuendá ña ndaa, ta kō kútúú ini yō noo Ndios sa'á ña kée yó. <sup>20</sup> Tído tá kutúú ini yō sa'á ña ni kee yó, dá kían ná kana'á yó ña ká'ano cháá ka Ndios o duú nío yō, chí ná'á va'a ná sa'a ndidaá kúú ña'a kée yó.

<sup>21</sup> Na maní miíi, tá kō kútúú ini yō, dá kían ió tandeé iní yō xí'ín Ndios, <sup>22</sup> ta ndi ndaa miío ña'a ná kaka yō noo ná, ta kúú ni'i vá yóan, dá chí kée yó choon sa'anda na, ta kée yó ña kóni na. <sup>23</sup> Ta ña yó'o kúú choon ni sa'anda Ndios noo yō ña ná kandísa yó de'e na Jesucristo, ta ná ku'u ini sa'a sátá'an yó tát'on ki'o ni sa'anda na choon noo yō.

<sup>24</sup> Chí ndi ndaa na kée choon sa'andá Ndios, noón kúú na ñó'o noo ndá'a Ndios, ta ió Ndios xí'ín ná. Ta sa'á ña ió Espíritu i Ndios ini nío yō, sa'á ñóo kándaa ini yō ña ió Ndios xí'ín yó.

#### Ta ki'o di'a kándaa ini yō ndá yoo kómí Espíritu Ndios

**4** <sup>1</sup> Na maní miíi, o sa kándísa ndó ndidaá ñayuu, na ká'an ña kómí ná Espíritu Ndios. Dinñó'ó ka korndodó ndó na, ná kande'á á miían ndaa kómí ná Espíritu Ndios o koó. Dá chí kua'á nda'o profeta to'ón xionoo iin ní kúú ñayuú. <sup>2</sup> Di'a kee ndó, dá kándaa ini ndo tá miían ndaa kuiti kómí ná Espíritu Ndios: tá nákoní na ña miían ndaa kuiti ni nduu Jesús iin taa ñayuú yó'o, dá kían noón kúú na kómí Espíritu Ndios. <sup>3</sup> Ta ñayuu kō nákoní ña ni nduu Jesús iin taa ñayuú yó'o, noón kúú na kō kómí Espíritu Ndios, chí nákaní ini na tát'on taa xiní u'u Cristo. Sa ni seídó'o vá mií ndó ña kii ra, ta sa xionoo va ra ñayuú yó'o viti.

<sup>4</sup> De'e kuálí, kana'á ndó ña ndo'ó kúú ñayuu Ndios, ta sa ni kandeé ndó xí'ín ra kátoó dándá'í ñaá, chí ká'ano cháá ka Ndios, na ió xí'ín ndó, o duú ña kini ió ñayuú yó'o. <sup>5</sup> Taa yó'o kúú kuendá ñayuú yó'o, sa'á ñóo dána'a ra sa'á ña ió ñayuú yó'o va. Ta kúú kándísa vá ñaá ñayuu kō ná'á Ndios. <sup>6</sup> Tído yóó, kúú yó kuendá Ndios. Ta na ná'á Ndios, noón kúú na seídó'o ña dána'a yō. Ta na kō kúú kuendá Ndios, noón kúú na kō kóni kueídó'o ña ndaa dána'a yō, chí kō ná'á ná Ndios. Ta ki'o dión kándaa ini yō ndá yoo kómí Espíritu ndaa, ta ndá yoo kómí espíritu to'ón.

#### Ndios kúú na kú'u ini sa'a yō

<sup>7</sup> Na maní miíi, ná koo ini yō ku'u ini sa'a sátá'an yó, chí ña ku'u ini yō sa'a iin rá iin yó, ña yó'o kúú ña'a Ndios. Ta ndidaá kúú ñayuu, na kú'u ini sa'a dao ka ñayuu, na yó'o kúú na ni nduu de'e Ndios, ta ná'á ná Ndios. <sup>8</sup> Ta ndi ndaa na kō kú'u ini sa'a dao ka ñayuu, noón kúú na kō ná'á Ndios, chí Ndios kúú na kú'u ini sa'a yō. <sup>9</sup> Mií Ndios ni daná'a noo yō ña kú'u nda'o ini na sa'a yō, chí ni tanda'á ná iin tó'ón diní de'e na ñayuú yó'o ni kii na, dá ni'i yō ña kataki chíchí yó sa'a ná. <sup>10</sup> Ta ña yó'o xí'o ña kándaa ini yō ndi ki'o kú'u ini Ndios sa'a yō, ta ña ká'ano cháá

ka kían yó'o o duú ña kóni yo mií ná. Chi sa'á ña kú'u nda'o ini na sa'a yo, sa'á ñoó ni tanda'á ná de'e na ni kii na ñayuú yó'o, ta ni chiya'i na sa'á kuachi yó. <sup>11</sup> Na maní mií, tá k'i'o dión kú'u ini Ndios sa'a yo, dá kían k'i'o dión ta'ani kánian ku'u ini sa'a sátá'an yó. <sup>12</sup> Ni iin tó'on ta'on ñayuu ko ní kúu koni xí'in noo ná Ndios, tído tá ná ku'u ini sa'a sátá'an yó, dá kían ió Ndios xí'in yó, ta ni kasandaá yo kú'u ini yo sa'a dao ka ñayuu táto'on k'i'o kée mií ná.

<sup>13</sup> Ta sa'á ña ni xi'o na Espiritu iñ ná noo yo, sa'á ñoó kándaá ini yo ña ñó'o yó noo ndá'a Ndios, ta ió na xí'in yó. <sup>14</sup> Ta sa'á ña ni xini ndu, sa'á ñoó xí'o ndu kuendá noo ñayuu ña ni tanda'á tatá Ndios de'e na ni kii na, ta noón kúu na dákaki ñayuu ndéi ñayuú yó'o. <sup>15</sup> Ta ndi ndáa ñayuu nákoní ña Jesús kúu de'e Ndios, noón kúu na ñó'o noo ndá'a Ndios, ta ió Ndios xí'in ná. <sup>16</sup> Ta sa kándaá ini yo, ta kándisa yó ña kú'u ini Ndios sa'a yo. Ndios kúu na kú'u ini sa'a yo. Sa'á ñoó tá kú'u ini yo sa'a dao ka ñayuu táto'on k'i'o kée mií ná, dá kían ñó'o yó noo ndá'a Ndios, ta ió na xí'in yó.

<sup>17</sup> Ta xí'in ña yó'o ni kasandaá yo kú'u ndisa ini yo sa'a dao ka ñayuu, sa'á ñoó koo tandéé iní yo tá ná kasandaá kuu keyíko Ndios sa'a yo, dá chi táto'on k'i'o kée mií ná, k'i'o dión kée yó ñayuú yó'o. <sup>18</sup> Tá kú'u ndisa ini yo sa'a dao ka ñayuu, dá kían ko kánian yu'ú yo noo keyíko Ndios sa'a yo. Chi tá ni kasandaá yo kú'u ndisa ini yo sa'a dao ka ñayuu, ko káni kaan yu'ú yo. Chi ña yu'ú yo kían kóni kaa ña ká'an yó ña dándó'o Ndios nío yo. Ta ndi ndáa na yu'ú, noón kúu na ko ñá'a kasandaá na ku'u ndisa ini na sa'a dao ka ñayuu.

<sup>19</sup> Kóni yo Ndios, chi dinñó'ó mií ná ni ku'u ini sa'a yo. <sup>20</sup> Tá kaá yo ña kóni yo Ndios, ta xiní u'u yo ñani yo, dá kían kúu yó ñayuu to'ón. Dá chi tá ko kú'u ini yo sa'a ñani yo, tá'an na ndé'é yó ndéi xí'á, ¿ndi koo ví kaa yo ña kóni yo Ndios, na ko xini yo? <sup>21</sup> Dá chi mií Jesús ni sa'anda choon yó'o noo yo, ña tá kóni ndisa yó Ndios, dá kían kánian ku'u ini yo sa'a ñani yo.

### **Kúu yó de'e Ndios tá kándisa yó ña Jesús kúu na ni tanda'á Ndios dákaki ñaá**

**5** <sup>1</sup> Ndi ndáa ñayuu kándisa ña Jesús kúu Cristo, na dákaki ñaá, noón kúu na ni nduu de'e Ndios. Ta ndi ndáa na kú'u ini sa'a iin tatá, ta nda de'e na kú'u ta'ani ini na sa'a. <sup>2</sup> Ta k'i'o dión kándaá ini yo ña kú'u ini yo sa'a ndidaá na kúu de'e Ndios, chi kóni yo Ndios, ta kée yó choon sa'ándá na. <sup>3</sup> Tá kóni ndisa yó Ndios, dá kían kee yó choon sa'ándá na. Ta ko ta'ón ña kuachi kían kee yó choon sa'ándáan, <sup>4</sup> dá chi ndidaá na ni nduu de'e Ndios, noón kúu na kándéé xí'in ña kini ió ñayuú yó'o. Chi sa'á ña kándéé iní yo Jesús, sa'á ñoó kándéé yó xí'in ña kini ió ñayuú yó'o. <sup>5</sup> Ta, ¿ndá yoo kúu na kándéé xí'in ña kini ió ñayuú yó'o? Noón kúu na kándisa ña Jesús kúu de'e Ndios.

### Xí'o Espíritu ij Ndios kuendá sa'a Jesús

<sup>6</sup> Tá'an ña xí'o kuendá ña ni kii ndisa Jesucristo noo Ndios kúu takuíí xí'ín ni. Ta o duú takuíí oon ni xí'o kuendá, dá chi ni xí'ín takuíí kúu ra xí'o ndaa kuendá ña k'i'o dión kían. Ta Espíritu ij Ndios ta'ani kúu ña xí'o ndaa kuendá ña k'i'o dión kían, chi iin ña ndaa kúu Espíritu. <sup>7</sup> [Ta ña xí'o kuendá chí induú kúu tatá Ndios, xí'ín de'e, xí'ín Espíritu ij. Ta iin tó'ón vá kúu ndin oni ña yó'o.] Ta oni ta'ani kúu ña xí'o kuendá chí noñó'o yó'o ña ni kii Jesús noo Ndios. <sup>8</sup> Iin ña kúu Espíritu ij Ndios, ta iin ka ra kúu takuíí, ta iin ka ra kúu ni. Ta iin nóo xí'o ndaa Espíritu ij kuendá xí'ín takuíí xí'ín ni ña k'i'o dión kían. <sup>9</sup> Tá nátiin va'a yó kuendá xí'o taa, ná kana'á yó ña ndaya'i cháa ka kuendá xí'o Ndios, chi kuendá xí'o mií ná kían ká'an sa'á de'e na. <sup>10</sup> Ta ñayuu kándisa de'e Ndios, noón kúu ña ni taxi va'a to'on yó'o níó ná. Ta ña ko kándisa noo ká'an Ndios, noón kúu ña kétó'ón Ndios, chi ko kándisa na to'on ni xi'o Ndios, ña ká'an sa'a de'e na. <sup>11</sup> Ta ña yó'o kúu kuendá ni xi'o Ndios noo yo, ña sa ni xi'o na ña kataki chíchí yó, ta sava'a noo iin tó'ón de'e na ni'i yo ña kataki chíchí yó. <sup>12</sup> Ta ndi ndaa ñayuu ni natiin Jesús, ña kúu de'e Ndios, ini níó ná, noón kúu ña kataki chíchí. Tído ndi ndaa ña ko ní xín natiin ñaá, noón kúu ná o ní'i ta'on na ña kataki chíchí ná.

### Sa'á ña kándisa yó Jesús, sa'á ñoó kataki chíchí yó

<sup>13</sup> Táai to'on yó'o kosaa noo ndo'ó, ña kándisa de'e Ndios, dá kana'á ndó ña sa kómí ndó ña kataki chíchí ndó. <sup>14</sup> Ta ña yó'o kúu tandeé ini kómí yó noo Ndios, chi tá xíka yo iin ña'a noo ná táto'on k'i'o kóni mií ná, ta kúu seídó'o na ña xíka yo. <sup>15</sup> Ta sa'á ña ná'á yó ña seídó'o va'a ñaá Ndios tá xíka yo ndi ndaa mií vá ña'a noo ná, sa'á ñoó ná'á ta'ani yó ña ni'i yo ña xíka yo noo ná.

<sup>16</sup> Tá ni xini iin káa ndó iin ñani yo kée na kuachi, ña kían ko kúu kuachi ko kánian kuu ña, dá kían kánian kaka ndo ña maní noo Ndios sa'a ná, ta kúu k'i'o vá Ndios ña kían kataki ña. Dión kee ndó tá ko ní ya'a na kee na kuachi ña kían ko kánian kuu ña. Chi miían ndaa ió kuachi, ña kían kánian kuu yo. Tído ko ká'an ta'oin xí'ín ndó ña ná kaka ndo ña maní noo Ndios sa'a ñayuu kée dión. <sup>17</sup> Ndidaá kúu vá ña'a kini kúu kuachi noo Ndios. Tído ió kuachi, ña kían ko kánian kuu yo.

<sup>18</sup> Sa ná'á vá yó ña ndi ndaa ñayuu ni nduu de'e Ndios, ko kée ka ña kuachi, dá chi ndaa va ñaá mií de'e Ndios noo ña u'u, sa'á ñoó o kúu ta'on kendava'a ña u'u xí'ín ná. <sup>19</sup> Ta sa ná'á ta'ani yó ña ñó'o yó noo ndá'a Ndios, va'ará iin ní kúu ñayuú yó'o nákaa tixi ndá'a ña u'u. <sup>20</sup> Ta sa ná'á ta'ani yó ña ni kixi de'e Ndios, ta ni xi'o na ñaxintóni yo, dá ná kana'á yó ña miían ndaa kuiti kúu Ndios. Ta ñó'o yó noo ndá'a ña kúu Ndios ndaa, ta ñó'o ta'ani yó noo ndá'a de'e na Jesucristo. ña yó'o kúu ña miían ndaa kuiti kúu Ndios, ta xí'o na ña kataki chíchí yó.

<sup>21</sup> De'e kuáli míi, kanda ndo mí ndó noó ña kúú yoko. Díón ná koo.